

摘藻堂四庫全書薈要

集部

欽定四庫全書薈要

集部

御定詠物詩選卷一百

六十九至
八十一

欽定四庫全書薈要卷一萬八千七百九十一

集部

御定佩文齋詠物詩選卷一百六十九

五經類

四言古

周易

晉傳咸

卑以自牧謙尊而光進德修業既有典常暉光日新照
於四方小人勿用君子道長

毛詩

傳咸

離



無將大車維塵冥冥濟濟多士文王以寧顯允君子大猷是經

周官

傳咸

惟王建國設官分職進賢興功取諸易直除其不蠲無敢反側以德詔爵允臻其極

其二

辨其可任以告於正掌其戒禁治其政令各修乃職以聽王命

五言古

講易

宋 鮑 照

雲澤翔羽姬橫蓋招益人賁園無金尚履道易書紳

賦禮記

唐 李百藥

玉帛資王會郊丘叶聖情重廣開環堵至道軼金羸盤
薄依厚地遙裔騰太清方悅升中禮足以慰餘生

贈別殷山人說易後歸幽墅

唐 孟 郊

夫子說天地若與靈龜言幽幽人不知一一予所敦秋

月吐白夜涼風韻清源旁通忽已遠神感寐不喧一悟
祛萬結夕懷傾朝煩旅輶無停波別馬嘶去轅殷勤荒
草士會有知己論

五言律

經

唐
李嶠

漢室鴻儒盛鄒堂大義明五千道德闡三百禮儀成青
紫方拾芥黃金徒滿籩誰知懷逸辨重席冠群英

七言律

枕易

元黃庚

古鼎烟消倦點朱
脩然高卧夜寒初
四簷寂寂半牀夢
兩鬢蕭蕭一卷書
日月冥心知代謝
陰陽回首驗盈虛
起來萬象皆吾有
收拾乾坤在草廬

五言絕句

翫易齋

宋朱子

竹几橫陳處
韋編半掩時
寥寥三古意
此地有深期

七言絕句

易

朱子

立卦生爻事有因兩儀四象已前陳須知三絕韋編者
不是尋行數墨人

其二

潛心雖出重爻後著眼何妨未畫前識得兩儀根太極
此時方好絕韋編

明仁殿進講

元貢師泰

黃綾寫本奏經筵正是虞書第二篇聖主從容聽講罷

許教留在御牀邊

御定佩文齋詠物詩選卷一百六十九

欽定四庫全書薈要卷一萬八千七百九十二

集部

御定佩文齋詠物詩選卷一百七十

史類

四言古

于賈謐坐講漢書

晉潘岳

理道在儒弘儒由人顯允魯侯文質彬彬筆下摘藻席
上敷珍前疑既辨舊史維新維新爾史既辨爾疑延我
僚友講此微辭

五言古

詠司馬彪續漢志

唐太宗

二儀初創象三才乃分位非惟樹司牧固亦垂文字綿
代更膺期芳圖無輟記炎漢承君道英謨纂神器潛龍
既可躍術兔奚難致前史殫妙詞後昆沈雅思書言揚
盛跡補闕興鴻志川谷猶舊途郡國開新意梅山未覺
朽穀水誰云異車服隨名表文物因時置鳳戟翼康衢
鑒衡總柔轡清濁必能澄洪纖幸無棄觀儀不失序遵

禮方由事政宣竹律和時平玉條備文圖雕奇彩藝門
蘊深致雲飛星共流風揚月兼至類禋遵令典壇壝資
良地五勝竟無違百司誠有庇粵予承暇景談叢引衆
秘討論窮義府看覈披經笥大辨良難仰小學終先置
聞道諒知榮含毫孰忘愧

五言律

賦西漢

唐魏徵

受降臨軹道爭長趨鴻門驅傳渭橋上觀兵細柳屯夜

宴經柏谷朝遊出杜原終藉叔孫禮方知皇帝尊

詠史

唐李嶠

馬記天官設班圖地理新善談方疊疊青簡見彬彬方
朔初聞漢荆軻昔向秦正辭堪載筆終與作良臣

七言絕句

唐堯

唐周曇

妖氛不起瑞煙輕端拱垂衣日月明何事四方無外役
茅茨深處土階平

虞舜

周 曇

進善懲奸立帝功
功成揖讓益溫恭
滿朝卿士多元凱
為黜兇苗與四凶

夏禹

周 曇

堯違天孽賴詢謨
頓免洪波浸碧虛
海內生靈微伯禹
盡應隨浪化為魚

后稷

周 曇

人惟邦本本由農
曠古誰高后稷功
百穀且繁三曜在

牲牢郊祀信無窮

文王

周曇

昭然明德報天休
禴祭惟馨勝殺牛
二老五侯何所詐
不歸商受盡歸周

武王

周曇

文王寢膳武王隨
內豎言安色始怡
七載豈堪拘羑里
一夫為報亦何疑

成王

周曇

成王有過伯禽知聖惠能新日自竒王道既成何所感
越裳呈瑞鳳來儀

周公

周曇

文武傳芳百代基幾多賢哲守成規仍聞吐握延儒素
猶恐民艱未盡知

沛宮

唐胡曾

漢高辛苦事干戈帝業興隆俊傑多猶恨四方無壯士
還鄉高唱大風歌

圯橋

胡曾

妙算張良獨有餘
少年逃難下邳初
逡巡不進泥中履
爭得先生一卷書

細柳營

胡曾

文帝鑾輿勞北征
條侯此地整嚴兵
轅門不峻將軍令
今日爭知細柳營

延平津

胡曾

延平津路水溶溶
峭壁危岑一萬重
昨夜七星潭底見

分明神劍化為龍

山中作

唐僧處默

席簾高挂枕高歌
門掩垂蘿蘸碧溪
閒把史書眠一覺
起來山月過松西

御定佩文齋詠物詩選卷一百七十

欽定四庫全書薈要卷一萬八千七百九十三

集部

御定佩文齋詠物詩選卷一百七十一

讀書類

五言古

讀山海經

晉陶潛

孟夏草木長遶屋樹扶疎衆鳥欣有託吾亦愛吾廬既耕亦已種時還讀我書窮巷隔深轍頗迴故人車歡言酌春酒擿我園中蔬微雨從東來好風與之俱泛覽周

王傳流觀山海圖俯仰終宇宙不樂復何如

讀書

宋謝惠連

賁園奚足慕下帷故宜遵山成由一簣崇積始微塵虞
軒雖渺芥顏隰亦何人

帝京篇

唐太宗

巖廊罷機務崇文聊駐輦玉匣啟龍圖金繩披鳳篆韋
編斷仍續縹帙舒還卷對此乃淹留歌案觀墳典

山澗讀易軒

元劉永之

環環碧澗連靡靡蒼山屬初日照林端
春禽鳴布穀松深有去雲苔靜無來躅
獨把一編書時向窗間讀

七言古

澧水送鄭豐之鄆縣讀書

唐皇甫冉

麥秋中夏涼風起送君西郊及澧水
孤煙遠樹動離心隔岸江流若千里
早年江海謝浮名此路雲山愜爾情
上古全經皆在口秦人如見濟南生

五言律

送王正字山寺讀書

唐李嘉祐

欲究先儒教還過支遁居山階間聽法竹徑獨看書向日荷新卷迎秋柳半疎風流有佳句不似帶經鋤

和劉七讀書

唐錢起

夜雨深館靜苦心黃卷前雲陰留墨沼螢影傍華編夢鳥當青藻通經仍妙年何愁丹穴鳳不飲玉池泉

送獨孤馬二秀才居明月山讀書

唐賈島

濯志俱高潔儒科慕冉顏家辭臨水郡雨到讀書山栖
鳥梭花上聲鐘磔閣間寂寥窗外戶時見一舟還

七言律

送薛居士和州讀書

唐嚴維

孤雲獨鶴共悠悠萬卷經書一葉舟楚地巢城民舍少
煙邨社樹鷺湖秋蒿萊織妾晨炊黍籬落耕童夕放牛
年少不應辭苦節諸生若遇亦封侯

五言絕句

秋晚

明方登

秋晚行堤上書聲在茅屋月出不逢人風來弄修竹

七言絕句

讀老子

唐白居易

言者不知知者默此語吾聞於老君若道老君是知者
緣何自著五千文

讀孝經

唐方愚

星彩滿天朝北極源流是處赴東溟為臣為子須忠孝

莫負宣尼一卷經

寄雲臺觀田秀才

唐馬戴

雪壓松枝拂石窗
幽人獨坐鶴成雙
晚來漱齒敲冰渚
閒讀仙書倚翠幢

御定佩文齋詠物詩選卷一百七十一

欽定四庫全書薈要卷一萬八千七百九十四

集部

御定佩文齋詠物詩選卷一百七十二

書法總類

五言古

樂府

魏
曹植

墨出青松煙筆出狡兔翰古人感鳥跡文字有改判

七言古

以右軍書數種贈丘十四

宋
黃庭堅

丘郎氣如春景晴風暄百菓草木生眼如霜鶻齒玉冰
擁書環坐愛窗明松花泛硯摹真行字身藏穎秀勁清
問誰學之果蘭亭我昔頗復喜墨卿銀鈎蠆尾爛箱籛
贈君鋪案粘曲屏小字莫作癡凍蠅樂毅論勝遺教經
大字無過瘞鶴銘官奴作草欺伯英隨人作計終後塵
自成一家始逼真卿家小女名阿潛看目似翁有精神
試留此書他日學往往不減衛夫人

吳傳朋遊絲帖歌

宋
劉子翬

園清無瑕二三月時見遊絲轉空濶誰人寫此一段奇
著紙春風吹不脫紛紜糾結疑非書安得龍蛇如許癯
神蹤政喜縈不斷老眼只愁看若無定知苗裔出飛白
古人妙處君潛得勿輕漠漠一縷浮力適可挂千鈞石
睠余弟兄情不忘軸之遠寄悠然堂謝公遺髯凜若活
衛后落鬢搖人光馮思長安夜飛蓋醉哦聲落南山外
亂離契濶三十秋筆意與人俱老大政成著脚明河津
外家風流今絕倫文章固自有機杼戲事豈足勞心神

題唐摸蘭亭墨蹟

元鮮于樞

君家禊帖評甲乙和壁隋珠價相敵神龍貞觀苦未遠
趙葛馮湯總名蹟主人熊魚兩兼愛彼短此長俱有得
三百二十有七字字字龍蛇怒騰擲嗟余到手眼生障
有數存焉豈人力吾聞神龍之初黃庭樂毅真蹟尚無
恙此帖猶為時所惜况今相去又千載古帖消磨萬無
一有餘不足貴相通欲抱奇書求博易

七言律

題子固所藏鮮于墨蹟

元貢師泰

一自昭陵藏墨本書名誰復更超群
忽傳河朔專行草不讓吳興變隸分
黃鵠夜深隨落月白鵝秋冷化孤雲
風流賴有張公子雪繭封題比右軍

七言絕句

答柳柳州

唐劉禹錫

昔日傭工記姓名遠勞辛苦寫西京
近來漸有臨池興為報元常欲抗衡

重贈詩疊後

唐柳宗元

事業無成恥藝成
南宮起草舊連名
勸君火急添功用
趣取當時二妙聲

書劉景文左藏所藏王子敬帖

宋蘇軾

家雞野鷺同登俎
春蚓秋蛇總入奩
君家兩行十二字
氣壓鄴侯三萬籤

柳氏二外甥求筆迹

蘇軾

退筆如山未足珍
讀書萬卷始通神
君家自有元和脚
莫厭家雞更問人

雜詠

元黃庚

地多種竹堪容鶴
池不栽蓮恐碍魚
小徑荒苔人不到
閉門閒學換鵝書

王大令保母帖

元鮮于樞

姜侯才氣亦人豪
辨折區區漫爾勞
不向驪黃求駟駿
書家自有九方臯

其二

臨摹舊說范新婦古刻今看李意如却笑南宮米夫子
一生辛苦學何書

宣文殿

元周伯琦

延閣圖書取次陳講帷日日集儒臣墨池雲合天光絢
東壁由來近北辰

御定佩文齋詠物詩選卷一百七十二

欽定四庫全書薈要卷一萬八千七百九十五

集部

御定佩文齋詠物詩選卷一百七十三

御書類

五言律

羽林恩詔觀御書王太尉碑

唐張說

隴首名公石來承聖札歸魚龍生意態
鉤劒動鉞輝字得神明保詞慙少女
徽誰家羽林將又逐鳳書飛

五言排律

御題國子監門

唐闕名

宸翰符元造
榮題國子門
筆鋒迴日月
字勢動乾坤
簷下雲光色
梁間鵲影翻
張芝聖莫擬
索靖妙徒言
為著盤龍跡
能彰舞鳳尊
更隨垂露象
常以沐皇恩

七言律

御書雪林二字賜趙中丞應制

元揭傒斯

聖主揮毫臨秘閣
親臣執法坐崇臺
祥雲五色從天下

彩鳳雙飛映日來
政欲清如林上雪
已聞聲奮地中雷
君臣千載明良會
咫尺薇垣接上台

中都龍興寺伏覩御書第一山三大字碑有作

明周啟

九重宸翰麗天文
三字穹碑壓厚坤
山色不知今古異
地靈惟戴帝王尊
蛟龍絕嘯盤亭構
獅象諸天拱寺門
千載鍾王誇健筆
敢同義畫與時論

七言絕句

高宗御書

元歐陽玄

君王不愛辟寒釵
永巷泥金進損齋
欲上太清樓下石
啼鴉落日滿宮槐

御定佩文齋詠物詩選卷一百七十三

欽定四庫全書薈要卷一萬八千七百九十六

集部

御定佩文齋詠物詩選卷一百七十四

篆書類

五言古

鈔衆書應司徒教

齊王融

說禮固多才惇詩信為善嚴笥發仙華金滕開碧篆

借劉太常說文

陳江總

劉棻慕子雲許慎詢景伯碩學該蟲篆奇文秀鳥跡曰

余徒下帷待問垂重席不詣王充市聊投班玩籍三寫
徧鑽研六書多補益幽居服藥餌山宇生虛白留連嗣
芳杜曠蕩依泉石夫君愛滿堂願言馳下澤

觀洛出書

唐張欽敬

浮空九洛水瑞聖千年質竒象八卦分圖書九疇出含
微卜筮遠抱數陰陽密中得天地心旁探鬼神吉昔聞
夏禹代今獻唐堯日謬此叙彞倫寰宇賀清謐

觀洛出書

唐郭邕

德合天貺呈龍飛聖人作光宅被寰區圖書薦河洛象
登四氣順文闢九疇錯氤氲瑞彩浮左右靈儀廓微造
功不宰神行利攸博一見皇家慶方知禹功薄

陽水篆

宋王禹偁

泠泠庶子泉落落陽水筆雲氣勢奔垂龍蛇互蟠屈嶧
山既剝滅石鼓又缺失唯茲數十字遒勁倚雲窟摸印
徧寰區流傳耀緗帙書誠一藝爾小道詎可忽乃知出
人事千古名不沒

推官惠李庶子鄂州篆字

宋文同

天下有奇篆陽水書鄂州異獸呀五口狂咬掉三頭磔
砢玻瓈盤詰屈珊瑚鈎愧無希世寶何以為子酬

七言古

附長短句

李潮八分小篆歌

唐杜甫

蒼頡鳥跡既茫昧字體變化如浮雲陳倉石鼓又已訛
大小二篆生八分秦有李斯漢蔡邕中間作者寂不聞
嶧山之碑野火焚棗木傳刻肥失真苦縣光和尚骨立

書貴瘦硬方通神惜哉李蔡不復得吾甥李潮下筆親
尚書韓擇木騎曹蔡有鄰開元以來數八分潮也奄有
二子成三人況潮小篆逼秦相快劍長戟森相向八分
一字直百金蛟龍盤拏肉屈彊吳郡張顛誇草書草書
非古空雄壯豈如吾甥不流宕丞相中郎丈人行巴東
逢李潮逾月求我歌我今衰老才力薄潮乎潮乎奈汝
何

和永叔瑯琊山庶子泉陽冰石篆詩

宋
蘇舜欽

一氣氤氲萬事起獨有篆籀含其真周鼓秦山壞已久
下至唐室始有人宗臣轉注得天法質雖渾厚氣乃振
人間所存十數處豐踈異體世共珍其中琅琊石泉記
比之他法殊不倫鐵鎖關連玉鈎壯曲處力可挂萬鈞
復疑蛟虬植爪角隱入翠壁蟠未伸近來俗眼苦不賞
唯有風月時相親紫微仙人謫此守此地勝絕舊喜聞
公餘往觀領賓從獵獵畫隼搖青春遠休車騎步泉側

酌泉愛篆移朝昏揮弄潺湲翫點畫情通恍惚疑前身
作詩緘本遠相寄邀我共賦意甚勤昨承見教久閣筆
壓以大句尤難文高風勝事日傾倒安得身寄西飛雲
滕用亨諸篆體歌

明王行

維周大篆成史籀宣聖傳經製蚪蚪總因蒼頡見鳥跡
象形置書變未久李斯小篆類玉筋鐘鼎魚蟲分衆手
碧霄鸞鳳漫迴翔滄海蛟螭互蟠紐有如垂露楊柳葉
或似委薤劍環首許慎程邈評已彰餘子紛紛亦何有

有唐陽水號高古嘗搦鴻都嶧山譜新泉丹井尚幸存
纓珞麒麟折釵股刻符摹印氣候形義理深關非小補
南陽髯翁學古書雅與秦漢參錙銖古文奇字盪胸臆
豈若俗工譌魯魚自言初習勝國時玉雪左丞吾所師
荻莖錐沙指畫腹廿年勤苦求妍姿嗚呼方今世雍熙
明良際遇千載期大書功德勒金石絕勝草草人間碑

五言律

書

唐李嶠

削簡龍文見臨池鳥跡舒河圖八卦出洛範九疇初垂
露春光滿奔雲骨氣餘請君入木一寸乃非虛

五言排律

觀洛出書

唐叔孫元

清洛含溫溜元龜薦寶書波開綠字出瑞應紫宸居物
著羣靈首文成列卦初美珍翔閣鳳慶邁躍舟魚俾似
惟可遠休皇復在諸東都主人意歌頌望乘輿

七言律

謝許鍊師惠圖書

明危進

茅山許史舊諸孫還向仙臺卧白雲竹外畫沙迷鶴跡
花間引水泛鵝羣蒼崖翠刻金書字丹井銀牀玉篆文
蚪蚪早收東觀上幾人相倚播清芬

五言絕句

題三會寺倉頡造字臺

唐岑參

野寺荒臺晚寒天古木悲空堦有鳥跡猶似造書時

倉頡臺

唐李咸用

先賢憂民詐觀跡成網紀自有書契來爭及結繩理

七言絕句

倉頡臺

唐汪遵

觀跡成文代結繩
皇風儒教浩然興
幾人從此休耕釣
吟對長安雪夜燈

御定佩文齋詠物詩選卷一百七十四

欽定四庫全書薈要卷一萬八千七百九十七

集部

御定佩文齋詠物詩選卷一百七十五

真書類

五言古

王右軍

唐李白

右軍本清真瀟灑在風塵山陰過羽客愛此好鵝賓掃
素寫道經筆精妙入神書罷籠鵝去何曾別主人

七言古

臨池歌

宋 劉子翬

君不見鍾繇學書夜不眠以指畫字衣皆穿當時尺牘
來鄴下錦標玉軸爭流傳又不見魯公得法屋漏雨意
象咄咄臨千古斷碑零落翠苔封直氣英風猶可覩元
常獨步黃初際清臣後出今無繼風神迥出本天資巧
力亦自精勤至羨君好尚何高奇寒窗弄筆手生胝向
來失計墮塵網銳氣直欲摩雲飛男兒舌在心何忤卻
擬臨池尋舊學要須筆外見鍾顏會自蛟龍生掌握銀

鈎石刻余何愛勸以短歌君勿怠他時八體妙有餘此
歌儻可君紳書

七言律

丹陽子高得逸少瘞鶴銘於焦山之下及梁唐
諸賢四石刻共作一亭以寶墨名之集賢伯
鎮為之作記遠來求詩因作長句以寄

宋
蘇舜欽

山陰不是換鵝經京口猶存瘞鶴銘瀟灑集仙來作記

風流太守為開亭兩篇玉葉塵初滌四體銀鈎薜尚青
我久臨池無所得願觀遺法快沉冥

御定佩文齋詠物詩選卷一百七十五

欽定四庫全書薈要卷一萬八千七百九十八集部

御定佩文齋詠物詩選卷一百七十六

草書類

五言古

送草書獻上人歸廬山

唐孟郊

狂僧不為酒狂筆自通天將書雲霞片直至清明巔手
中飛黑電象外瀉元泉萬物隨指顧三光為迴旋驟書
雲霓霽洗硯山晴鮮忽怒畫蛇虺噴然生風煙江人願

停筆驚浪恐傾船

七言古

附長短句

草書歌行

唐李 白

少年上人號懷素草書天下稱獨步墨池飛出北溟魚
筆鋒殺盡中山兔八月九月天氣涼酒徒詞客滿高堂
牋麻素絹排數箱宣州石硯墨色光吾師醉後倚繩牀
須臾掃盡數千張飄風驟雨驚颯颯落花飛雪何茫茫
起來向壁不停手一行數字大如斗恍恍如聞神鬼驚

時時只見龍蛇走左盤右感如驚電狀同楚漢相攻戰
湖南七郡凡幾家家屏障書題徧王逸少張伯英古
來幾許浪得名張顛老去不足數我師此藝不師古古
來萬事貴天生何必要公孫大娘渾脫舞

蕭鄆草書歌

唐
顧況

蕭子草書人不及洞庭葉落秋風急上林花開春露濕
花枝濛濛向水泣見君數行之灑落石上之松松下鶴
若把君書比仲將不知誰在凌雲閣

懷素上人草書歌

唐戴叔倫

楚僧懷素工草書古法盡能新有餘神清骨竦意真率
醉來為我揮健筆始從破體變風姿一一花開春景遲
忽為壯麗就枯澀龍蛇騰盤獸屹立馳毫驟墨劇奔駟
滿座失聲看不及心手相師勢轉奇詭形怪狀翫合宜
有人若問此中妙懷素自言初不知

懷素上人草書歌

唐魯叟

吾觀開士多利用筆精墨妙誠堪重身上藝能無不通

就中草聖最天縱有時興發逞神機抽毫點墨縱橫揮
風聲吼烈隨手起龍蛇迸落空壁飛連拂數行勢不絕
藤懸查虺生奇節劃然放縱驚雲濤或時頓挫縈毫髮
自言轉腕無所拘大笑羲之用陣圖狂來紙盡勢不盡
投筆抗聲連叫呼信如鬼神助此道墨池未盡書已好
行路談君口不容滿堂觀者空絕倒所恨時人多笑聲
惟知賤實翻貴名觀爾向來三五字顛奇何謝張先生

懷素上人草書歌

唐王邕

衡陽雙峽插天峻青壁巉巉萬餘仞此中靈秀衆所知
草書獨有懷素奇懷素身長五尺四嚼湯誦咒吁可畏
銅瓶錫杖倚閒庭班管狡毫多逸意或粉壁或綵牋蒲
葵絹素何相鮮忽作風馳及電掣更點飛花兼散雪寒
猿飲水撼枯藤壯士拔山伸勁鐵君不見張芝昔日稱
獨賢君不見近日張旭為老顛二公絕藝人所惜懷素
傳之得真跡崢嶸盛出海上山突兀狀成湖畔石一縱
又一橫一歌又一傾臨江不羨飛帆勢下筆長為驟雨

聲我牧此州喜相識又見草書多惠力懷素懷素不可
得開卷臨池轉相憶

賦虞書歌

唐賈耽

衆書之中虞書巧體法自然歸大道不同懷素只攻顛
豈類張芝惟劖草形勢素奇筋骨老父子君臣相揖抱
孤青似竹更颼颼濶白如波長浩渺誰能方正不隳倒
功夫未至難尋奧須知孔子廟堂碑便是青箱中至寶

詈光大師草書歌

唐僧貫休

雪壓千峰橫枕上窮困雖多還激壯看師逸蹟兩相宜
高適歌行李白詩海上風驚驅猛燒吹斷狂煙著沙草
江樓曾見落星石幾回試發將軍砲別有寒鵬掠絕壁
提上元猿更生力又見吳牛磨角來舞槃盤刀初觸擊
好文天子握宸翰御製本多堆玉案晨開水殿教題壁
題罷紫衣親寵錫僧家愛詩自拘束僧家愛畫亦局促
惟師草聖藝偏高一掬山泉心便足

觀子玉郎中草聖

宋

蘓軾

柳侯運筆如電閃子雲寒悴羊欣儉百斛明珠便可扛
此書非我誰能雙

題紫微老人大字歌

元歐陽玄

紫微老人射生手挽强竟取黃金斗驃騎營中拜驍勇
鳳凰池上稱耆舊時平腕力無所施筋骨猶能學顏柳
縱橫戎略結構體殺活兵機屈伸肘山莊劉氏得最多
當日檐榆駐應久高樓大扁曰明遠况又愛山并尚友
我来後公五十年主人酌我樓中酒平田野水鳬雁集

重崗複嶺蛟龍走登高欲賦乏佳興忽覩台躔照窗牖
家藏有此希世珍取酒當為主人壽想當洗硯攷筆時
羽簑生風劍龍吼焉知今人正傳翫名與麒麟同不朽
嶠南魁颯十五秋老將如今安得有鄂公九原如可作
養壽清商為公奏

遊龍回寺碧雲堂有何無適草書

元許謙

蒼鱗作霖回壑裏竟化長岡飛不起何年老僧飛錫來

强架檐楹萬山底碧雲石梯如登天俯視竹樹行其巔
巖巒起伏呈怪狀壯若羣馬奔吾前何仙仙去不復返
滿壁龍蛇驚醉眼可憐一半委泥沙况復貼危混苔蘚
山翁摸搨妙入神永和繭紙且逼真勸君勿辭一日力
為我留為百世珍君不見二王舊帖皆殘編至今不惜
千金傳

草書歌

明宣宗

草書所自何所授初變楷法為章奏當時作者最得名

崔瑗杜度張伯英三人真跡已罕見後來繼之有羲獻
筆端變化妙入神逸態雄姿看勁健風驚電掣浮雲飛
蛟龍奮躍猛虎馳漢晉草法千載師張顛藏真亦絕奇
一代精藝才數輩遺墨千人萬人愛固知頓挫出腕力
亦用飛動生神采古來篆籀今已譌何況隸草譌愈多
吾書豈必論工緻誠懸有言當默識

七言律

洛中寺北樓見賀監草書題詩

唐
劉禹錫

高樓賀監昔曾登壁上筆跡龍虎騰
中國書流尚皇象
北朝文士重徐陵偶因特見空驚目
恨不同時便伏膺
惟恐塵埃轉磨滅再三珍重囑山僧

七言絕句

題懷素上人草書

唐
許瑤

志在新奇無定則古瘦澀穠半無墨
醉來信手兩三行
醒後却書書不得

禁直

明唐敏

天門旭日炫新晴
鳳髓龍香硯墨清
親見君王書草字
蛟龍吹雨雜風聲

御定佩文齋詠物詩選卷一百七十六

欽定四庫全書薈要卷一萬八千七百九十九

集部

御定佩文齋詠物詩選卷一百七十七

書札類

七言律

將發洛中枉令狐相公手札兼辱二篇寵行以

長句答之

唐白居易

尺素忽驚來梓澤雙金不惜送蓬山八行落泊飛雲雨
五字鎗鏃動珮環玉韻乍聽堪醒酒銀鈎細讀當披顏

收藏便作終身寶何啻三年懷袖間

初冬月夜得皇甫澤州手札并詩數篇因遣報

書偶題長句

白居易

清冷玉韻兩三章落泊銀鈎七八行心逐報書懸雁足
夢尋來路遶羊腸水南地空多明月山北天寒足早霜
最恨發醅新熟酒迎冬不得共君嘗

得故人書

明沈貞

蕭蕭落葉蔽荒苔流水柴門晝始開紫塞雁從江上過

故人書向日邊來
秋風客舍心千里
夜雨燈窗看幾回
迢遞關河空念別
何時能報一枝梅

五言絕句

雜詠

唐王維

家住孟津河
門對孟津口
常有江南船
寄書家中否

夾溝遇邑人
問家信

明楊士奇

聞道故鄉來
辭家今遠近
恐有南京書
停舟試相問

懷鄒子序

明謝榛

渺渺太湖水湖中多鯉魚故人時把釣應有北來書

七言絕句

答友懷野寺舊居

唐李端

自嫌野性共人疎憶向西林更結廬寄謝山陰許都講
昨來頻得遠公書

秋思

唐張籍

洛陽城裏見秋風欲作家書意萬重復恐匆匆說不盡
行人臨發又開封

得袁相書

唐白居易

穀苗深處一農夫面黑頭斑手把鋤何意使人猶識我
就田來送相公書

小碎

唐元稹

小碎詩篇取次書等閒題柱意何如諸郎到處應相問
留取三行代鯉魚

端州江亭得家書

唐李紳

雨中鵲語喧江樹風處蛛絲颺水潯開拆遠書何事喜

數行家信抵千金

別王十後附書

唐杜牧

重關曉渡宿雲寒
羸馬原知步步難
此信的應中路見
亂山何處折書看

送友人之湖上

唐陸龜蒙

故人溪上有漁舟
竿倚風蘋夜不收
欲寄一函聊問訊
洪喬寧作置書郵

寓書

元范梈

欲寫鄉書寄故園
行人已遠意空存
舉頭却見南來雁
箇箇隨春度塞門

秋日作

明練子寧

水精簾動桂花風
湘簟涼生八月中
魄落西窗銀燭裏
烏絲雪繭寄秋鴻

御定佩文齋詠物詩選卷一百七十七

欽定四庫全書薈要卷一萬八千八百集部

御定佩文齋詠物詩選卷一百七十八

碑類

五言古

觀李九少府翦樹宓子賤神祠碑

唐高適

吾友吏茲邑亦嘗懷宓公安知夢寐間忽與精靈通一
見興永歎再來激深衷賓從何逶迤二十四老翁於焉

建層碑突兀長林東作者無愧色行人感遺風坐令高
岸盡獨對秋山空片石勿謂輕斯言固難窮龍盤色絳
外鵲顧偃波中形勝駐群目堅貞指蒼穹我非王仲宣
去矣徒發蒙

太學創置石經

唐馮涯

聖唐復古制德義功無替奧旨悅詩書遺文分篆隸銀
鈎互交映石壁靡塵翳永與乾坤期不逐日月逝儒林
道益廣學者心彌銳從此理化成恩光遍遐裔

晉銘

宋文同

長安鬻碑者遺我古鼎銘不知其所來有眼實未經凡
百十九字詭怪摹物形縱橫下點畫不類子與丁試考
諸傳說其源已冥冥宣王石鼓文氣韻殊飄零始皇嶧
山碑骨骼何玲瓏我恐雨粟時正為此物靈安得倉頡
神提去詢大庭為我譯其辭讀之駭羣聽

七言古

附長短句

岫嶺山

唐韓愈

峻嶺山尖神禹碑字青石赤形模竒蚪蚪拳身薤倒披
鸞飄鳳泊拏虎螭事巖跡秘鬼莫窺道人獨上偶見之
我來咨嗟涕漣漣千搜萬索何處有森森綠樹猿猱悲

石鼓歌

唐
韋應物

周宣大獵兮岐之陽刻石表功兮煒煌煌石如鼓形數
止十風雨缺訛苔蘚濕今人濡紙脫其文既擊既掃白
黑分忽開滿卷不可識驚潛動蟄走云云喘遶迤相糾
錯乃是宣王之臣史籀作一書遺此天地間精意長存

世冥冥秦家祖龍還刻石碣石之杲李斯跡世人好古
猶法傳持來比比殊懸隔

五言律

送呂向補闕往西嶽勒碑

唐徐安貞

聖作西山頌君其出使年勒碑懸日月驅傳接雲煙寒
盡函關路春歸洛水邊別離能幾許朝暮玉墀前

春初送呂補闕往西嶽勒碑

唐孫逖

刻石記天文朝推谷子雲篋中緘聖札巖下揖神君語

別梅初豔為期草欲薰
往來春不盡離思莫氛氲

送翰林張司馬南海勒碑

唐杜甫

冠冕通南極文章落上台
詔從三殿去碑到百蠻開
野館濃花發春帆細雨來
不知滄海上天遣幾時回

送翰林張學士嶺南勒碑

唐司空曙

漢恩天外洽周頌日邊稱
文獨司空羨書兼太尉能
出關逢北雁度嶺逐南鵬
使者翰林客餘春歸灞陵

七言律

和襲美為新羅弘惠上人謨靈鷲山周禪師碑

送歸詩

唐
陸龜蒙

一函迢遞過東瀛祇為先生處乞銘
已得雄詞封靜檢却懷孤影在禪庭
春過異國人應寫夜讀滄洲怪亦聽
遙想勒成新塔下盡望空碧禮文星

七言絕句

題酸棗縣蔡中郎碑

唐
王建

蒼苔滿字土埋龜風雨銷磨絕妙辭
不向圖經中舊見

無人知是蔡邕碑

題酸棗驛前碑

唐張祐

蒼苔古澀字雕疏誰道中郎筆力餘長愛當時遇王粲
每來碑下不關書

御定佩文齋詠物詩選卷一百七十八

欽定四庫全書薈要卷一萬八千八百一

集部

御定佩文齋詠物詩選卷一百七十九

筆類

五言古

詠筆

梁武帝

昔聞蘭蕙月獨是桃李年春心倘未寫為君照情筵

詠筆

梁徐摛

本自靈山出名因瑞草傳纖端奉積潤弱質散芳煙直

寫飛蓬牒橫承落絮篇一逢提握重寧憶仲升捐

聖俞惠宣州筆戲書

宋 歐陽修

聖俞宣城人能使紫毫筆宣人諸葛高世業守不失緊
心縛長毫三副頗精密硬軟適人手百管不差一京師
諸筆工牌榜自稱述纍纍相國東比若衣縫蟲或柔多
虛尖或硬不可屈但能裝管榻有表曾無實價高仍費
錢用不過數日豈如宣城毫耐久仍可乞

代東曾小軒謝馮筆蠟紙之貺

元
吳澄

束縛山中豪寸管入時操幾微見鋒銳可敵古鉛刀江
人有妙悟匪直取價高坡公詫葛吳蔡澡朱所褒邇來
浙西馮聲實相朋曹小技足名世屠龍寧自勞

七言古 附長短句

紫毫筆

唐
白居易

紫毫筆尖如錐分利如刀江南石上有老兔啣竹飲泉
生紫毫宣城之人采為筆千萬毛中選一毫毫雖輕功

甚重管勒工名充歲貢君今臣今勿輕用勿輕用將何
如願賜東西府御史願頒左右臺起居握管趨入黃金
闕抽毫立在白玉除臣有奸邪正衙奏君有動言直筆
書起居郎侍御史爾知毫筆不易致每歲宣城進筆時
紫毫之價如金貴慎勿空將彈失儀慎勿空將錄制詞

劉遠筆

金
元好問

老斂力能舉玉杵文陣挽強猶百鈞惜哉變化太狡獪
嚮也褐衣今虎文宣城諸葛寂無聞前後兩劉新策勲

謝郎神鋒恨太雋雖然豈不超人羣三錢雞毛吐古墳
尖奴定能張吾軍何時酌我百壺酒為汝醉草垂天雲

無筆歎

元 胡天游

宣城鼠鬚不可索越南雞毛不可得山中老穎飛上天
九館癡髯化為石晴窗無復禿千枝曉夢有時來五色
一庭老葉掃西風袖手空堦看蝸迹

贈筆工陸繼翁

明 曾 棨

吳興筆工陸文寶制作不與常人同自然入手造神妙

所以舉世稱良工有時盤礴坐軒東石盤水清如鏡中

空山老兔脫毛骨簡拔精銳披蒙茸平原霜氣在毫末
水面猶覺吹秋風製成進入蓬萊宮紫花彤管飛晴虹
九重清燕發宸翰五色絢爛皆成龍國初以來稱絕藝
光價自此垂無窮美哉文寶名已久當有家法傳繼翁
我時得之一揮灑落紙欲挫詞場鋒棗心蘭藥動光彩
栗尾雞距爭奇雄竭來簪此扈仙蹕欲補造化難為功
夢中何人授五色安得錦繡蟠心胸閑來書空不成字

縱有篆刻慚雕蟲幸今太平重文學玉堂金馬多奇逢
莫言盛世少知己為我寄謝管城公

鐵筆行為王元誠作

明 王守仁

王郎宋代中書孫鑄鐵為筆書堅珉畫沙每笑唐長史
拔毫未數秦將軍高堂落筆神鬼怒九萬驚箋碎如霧
鉛淚霏霏灑露盤金聲錚錚入秋樹鳥迹微茫科斗變
柳薤凋傷悲榴篆鼓文已裂岐陽石漆燈空照山陰
王郎筆藝精莫傳幾度索我東歸篇毛錐不如鐵錐利

吾方老鈍君加鞭
矢爾鐵心磨鐵硯
淬鋒要比婆留箭
太平天子封功臣
脫囊去寫黃金券

秋日李氏東堂同長蘅觀曝圖畫張伯夜貽畫

筆柬謝

明程嘉燧

秋雲杲杲天景澄
高堂與客翻絃絃
藤瀟湘水濶愁嘉陵
江花有情遙沾膺
閒門此時無人應
紫毫一束煩高朋
雞距脫手新鋒稜
未忍用點屏間蠅
青松短壑臨層冰
顛崖老樹雲門僧
貌君布襪予行滕

五言律 附小律

筆

唐 李嶠

握管門庭側含毫山水隈
霜輝簡上發錦字夢中開
鸚鵡攜文至麒麟絕句來
何當遇良史左右振奇才

詠宣州筆

唐 耿湣

寒竹漸虛受纖毫任幾重影
端緣守直心勁賴藏鋒
落紙驚風起搖空挹露濃
丹青與紀事捨此復何從

李員外寄紙筆

唐 韓愈

題是臨池後分從起草餘
兔尖針莫並繭淨雪難如
莫怪殷勤謝虞卿正著書

詩筆

宋林逋

青鏤墨淋漓珊瑚架最宜
靜援花影轉孤卓漏聲遲
題柱吾何取如椽彼一時
風騷蕪草隸千古有人知

乞筆

宋曾幾

市上無佳筆營求亦已勞
護持空雪竹束縛欠霜毫
此物藏三穴煩公拔一毛
不圖髯主簿取用價能高

七言律

楊尚書寄柳筆知是小生本樣令更商榷使盡
其功輒獻長句

唐柳宗元

截玉銛錐作妙形貯雲含霧到南溟尚書舊用裁天詔
內史新將寫道經曲藝豈能裨損益微辭祇欲播芳馨
桂陽卿月光輝徧毫末應傳顧兔靈

贈筆工范君用

元郭天錫

光分顧兔一毫芒徧灑春分翰墨場得趣妙從看劍舞

全身功貴善刀藏夢花不羨雕蟲巧試草曾供倚馬忙
昨過山僧餘習在小書紅葉拭新霜

鼠鬚筆

元謝宗可

夜逐虛星上月宮奮然奪得管城公橐中不攬噓窗夢
指下先爭翰苑功莫笑硯池濡醉墨絕勝倉廩飽陳紅
平生啗盡詩書字散作龍蛇落紙中

羊毫筆

明瞿佑

毛穎年深老不能中書模畫歎難勝管城忽現左元放

草澤不容嚴子陵壁上榴皮功可述門前竹葉事無憑
剛柔何必吹毛問耐久真堪作友朋

五言絕句

詠筆

唐楊收

雖非囊中物何堅不可鑽一朝操政柄定使冠三端

七言絕句

仙女詞

唐施肩吾

仙女羣中名最高曾看王母種仙桃手題金簡非凡筆

道是天邊玉兔毛

酬馬或

唐
韓定辭

宗霞臺上神仙客
學辨癡龍藝最多
盛德好將銀筆述
麗詞堪與雪兒歌

筆

唐
闕名

能令音信通千里
解致蛟龍運八行
縱使江生未相賞
應緣自負好文章

筆離手

唐
薛濤

越管宣毫始稱情紅箋紙上撒花瓊都緣用久鋒頭盡
不得義之手裏擎

謝筆

元倪瓚

陶泓思渴待陳玄對楮先生意未宣何似中書君並至
明窗脫帽一欣然

筆

明郭登

綰蚓塗鴉不自嫌却將毫末強揪擣中書老矣真無用
猶向人前要出尖

小遊仙

明
桑悅

仙童驚報筆生花
萬丈長虹纈彩霞
獨進詞頭三百卷
承恩常醉玉皇家

謝車叔銘寄筆

明
僧德祥

寄來名筆自湖州
珍重齋中什襲收
早晚翻經有僧到
芭蕉先種待新秋

御定佩文齋詠物詩選卷一百七十九

欽定四庫全書薈要卷一萬八千八百二

集部

御定佩文齋詠物詩選卷一百八十

墨類

五言古

孫莘老寄墨

宋蘇軾

徂徠無老松易水無良工珍材取樂浪妙手惟潘翁魚
胞熟萬杵犀角蟠雙龍墨成不敢用進入蓬萊宮蓬萊
春晝永三殿明房櫳金箋灑飛白瑞霧縈長虹遙憐醉

常侍一笑開天容

其二

谿石琢馬肝剡藤開玉版
噓噓雲霧出奕奕龍蛇綰
此中有何好秀色紛滿眼
故人歸天祿古漆窺蠹簡
隄靡給尚方老手擅編剡
分餘幸見及流落一歎報

其三

我貧如飢鼠長夜空齧齧
瓦池研竈煤葦管書柿葉
近者唐夫子遠致烏玉玦
先生又繼之圭璧爛箱篋
晴窗

洗硯坐蛇蚓稍蟠結便有好事人敲門求醉帖

贈墨生

元倪瓚

巖谷春風起桐花落澗紅隔水輕煙發收煤入竈中豹
囊秘玄玉驚池生白虹湯生法潘谷千載事同風

七言古

附長短句

酬張司馬贈墨

唐李白

上黨碧松煙夷陵丹砂末蘭麝凝珍墨精光乃堪掇黃
頭奴子雙鵝鬚錦囊養之懷袖間今日贈余蘭亭去興

來灑筆會稽山

夢錫惠墨答以蜀茶

宋 孔平仲

墨者色自黑黑者墨之宜所以陳玄號問之于退之近
世工頗拙巧惟見欺摹成古鼎篆團作革靴皮揮毫
見慘淡色比突中煤誰最蓄佳品鄭君真好竒贈我以
所貴有不讓金屏堅如雷公石端若大禹圭研磨出深
黝落紙光陸離較之囊中舊相去乃雲泥辱君此賜固
已厚何以報之乏瓊玖不如投君以嗜好君性嗜茶人

罕有建谿龍鳳想厭多越上槍旗不禁久我收蜀茗亦
可飲答我峨嵋高太守人情或以少為珍心若喜之當
適口更憐此物來處遠三峽驚波如電卷江湖重覆千
萬里淮海浩蕩漣漪淺舍舟登陸尚相隨今以答君非
不腆開緘碾發試一嘗尤稱君家桐葉盞

次韻答舒教授觀余所藏墨

宋蘇軾

異時長笑王會稽野鷺臙腥汙刀几暮年卻得庾安西
自厭家雞題六紙二子風流冠當代顧與兒童爭慍喜

秦王十八已龍飛嗜好晚將蛇蚓比我生百事不挂眼
時人繆說余工此世間有癖念誰無傾身障麓尤堪鄙
一生當著幾兩屐定心肯為微物起此墨足支三十年
但恐風霜侵髮齒非人磨墨磨人併應未罄壘先耻
逝將振衣歸故國數畝荒園自鋤理作書寄君君莫笑
但覓來禽與青李一螺點漆便有餘萬竈燒松何處使
君不見永寧第中擣龍麝列屋閒居清且美倒暈連眉
秀嶺浮雙鴉畫髮香雲委時聞五斛賜蛾綠不惜千金

求獺髓聞君此詩當大笑寒窗冷硯冰生水

謝景文惠浩然所作廷珪墨

宋黃庭堅

廷珪贗墨出蘇家麝煤添澤紋烏鞞柳枝瘦龍印香字
什襲一日三摩抄劉侯愛我如桃李揮贈要我書萬紙
不意神禹治水圭忽然入我懷袖裏吾不能手抄五車
書亦不能寫論付官奴便當閉門學水墨灑作江南驟
雨圖

贈僧法一墨

宋晁冲之

黃山之巔百尺松虬枝偃蓋連羣峰山神守護魑魅避
道人剪伐天為容捫崖蹠蹕篝火遠絕壁晝靄凝煙濃
玄霜霏霏玉杵下捕麋煮角當嚴冬陰房風日不可到
律管吹盡灰無踪小書細字著名姓黃金照耀圖雙龍
守臣再拜選進日九闕有詔開重重老儒偶得實天幸
千金更買無由逢上人淡泊何所好工書草隸如飛蓬
苦來求我惜不得一酬十載相過從君不見玉堂詞人
紫垣客拜賜舞蹈黃羅封長安紙價猶未貴江南江北

山皆童

再以承晏墨贈僧法一

晁冲之

我聞江南墨官有諸奚老超尚不如廷珪後來承晏復
秀出喧然父子名相齊百年相傳紋斷碎彷彿尚見蛟
龍背電光屬天星斗昏雨痕倒海風雲晦却憶當年清
暑殿黃門侍立才人見銀鈎灑落桃花牋牙牀磨試紅
絲硯同時書畫三萬軸大徐小篆徐熙竹御題四絕海
內傳秘府毫芒惜如玉君不見建隆天子開國初曹公

受詔行掃除王侯舊物人今得更寫西天貝葉書

陳循中求賦高麗墨詩為作長句

宋謝邁

老松收煙作玄玉可試洮中鴨頭綠來從萬里古樂浪
傳到麻源第三谷要須岱郡鹿角膠擣成方解土炭朝
請君磨研寫新作一弄潺湲訪康樂

謝錢珣仲惠高麗墨

宋韓駒

王卿贈我三韓紙白若截肪光照几錢侯繼贈朝鮮墨

黑如點漆光浮水舊傳績溪多老松奚超已往松亦空
易水良工近名世珍才始不歸潘翁蕭然南堂一居士
赤管隄麋無月賜借問玄圭何自來去年海中持節使
明窗晏坐不忽忽引紙磨墨寒生風自笑平生綰蛇蚓
更慚爾雅注魚蟲殷勤二物從來遠稗海寰瀛眼中見
苦欲揮寫藏名山不如却作談天衍

桐花煙為吳國良賦

元
台哈布哈

吳郎骨相非食肉朝食桐花洞庭曲洞庭三月桐始華

千枝萬朶搖江綠吳郎采采盈傾筐寶之不啻瓊膏粟
真珠龍腦吹香霧夜夜山房擣玄玉墨成誰共進蓬萊
天顏一笑金門開河伯香飛噴木葉太守噓氣成樓臺
龍賓十二吾何有不意龍文入吾手芙蓉粉暖玻璃匣
雲藍色映彤墀柳玉堂退食春晝長桃花紙透水油光
筠管時時濡秀石銀鈎歷歷凝玄霜君不聞易水仙人
號奇絕落紙三年光不減又不聞唐夫子致烏玉玦坡
老當年書柿葉惜哉唐李不復見吳郎善保千金訣鳴

呼吳郎善保千金訣

贈陶得和製墨

元倪瓚

麋膠萬杵搗玄霜
螺製初成龍井庄
悟得廷珪張遇法
古松煙細色蒼蒼
桐花煙出潘衡後
依舊升龍柳枝瘦
請看陶法妙非常
一點濃雲瓊楮透

五言律

墨

唐李嶠

長安分石炭上黨結松心
遶畫蠅初落含滋緩更深悲

絲光易染疊素彩還沈別有張芝學書池幸見臨

江東魏元德所製齊峰墨於上都慈仁殿賜文
錦馬潼以寵之既南歸作詩以贈云

元
納新

錦襲玄圭瑩龍香秘閣浮清毫春黛濕拂楮翠雲流繡
綺頒宮掖瓊漿出殿頭小臣沾雨露千載荷恩休

七言律

謝吳宗師惠墨

元
虞集

念我衰年不廢書錦囊古墨送幽居明窗塵影丹同熟
玄圃雲英玉不如敢謂文章勝虎豹祇應箋註到蟲魚
研磨不盡人間老傳與兒孫尚有餘

三用韻答巢翁就以奎章賜墨贈之

虞集

隣父常思長史書不辭頻謁老巢居臨池三月玄霜盡
對月千篇白雪如賦敵洛波翔翠羽歌成湘浦媵文魚
故分瀘石松煙色猶是奎章舊賜餘

贈沈生賣墨

元倪瓚

桐煙墨法後松煙妙賞坡翁已久傳
麋角膠清瑩玄玉龍文刀利淬寒泉
山解惟珍白鴛帖雲窗誰錄古苔篇
愛爾治生吳市隱收煤一室數燈然

七言絕句

右軍墨池

唐劉言史

永嘉人事盡歸空逸少遺居蔓草中
至今池水涵餘墨猶與諸泉色不同

贈墨生吳善

元倪瓚

銅官山下白雲亭澗底長松長茯苓傳得潘生燒墨法
墨成持贈寫丹經

御定佩文齋詠物詩選卷一百八十

欽定四庫全書
養要卷一萬八千八百三

集部

御定佩文齋詠物詩選卷一百八十一

硯類

附硯山

三四言

書硯銘

周武王

石墨相著而黑邪心讒言無得汙白

五言古

詠硯

唐楊師道

圓池類壁水輕翰染煙華將軍欲定遠見棄不應賒

石硯

唐杜甫

平公今詩伯秀發吾所羨奉使三峽中長嘯得石硯巨
璞禹鑿餘異狀君獨見其滑乃波濤其光或雷電聯坳
各盡墨多水遞隱見揮灑容數人十手可對面比公頭
上冠貞質未為賤當公賦佳句况得終清宴公舍起草
姿不遠明光殿致於丹青地知汝隨顧盼

謝楊侍讀惠端溪紫石硯

宋文同

學文二十年語氣殊未成所以文房中四譜無一精豈
不願收貯竊恐好事名自愧中槁然敢假外物榮前日
下秘閣謁公來西城公常顧遇厚待以為墨卿延之吐
佳論出口無雜聲語次座上物硯有紫石英云在嶺使
得渠常美其評因取手自封見授囑所擎倉皇奉以拜
其喜懷抱盈歸來示家人衆目歡且驚言並我所有瓦
礫而瑤瓊貴價市珍煤風前試寒泓磨知密理潤點覺
浮光清洗濯鑑面瑩彈扣牙音鏗遂剪什襲巾加以重

簋盛客來有欲觀稍俗不敢呈願傳之子孫更重金滿
簋作詩敘嘉貺慙比毫毛輕

遊龍尾山

宋 王 炎

他山石徒多器寶匿幽僻產璞芙蓉坑金聲而玉德岡
巒外鉤聯地勢中斷隔曲塢八九家路入羊豕迹澗水
抱石根石骨多紺碧北山上攬天南山勢蟠伏硯工二
百指日鑿崔嵬腹篝燈礪斧斤深入逾百尺我行冒風
雨周覽不知夕夜宿茅茨下青燈照岑寂酒闌呼匠氏

訪之語纖悉冰蠶吐銀絲鮫人織霧縠巧手琢磨之價
值黃金鎡斷竒半傾歌舊穴久湮塞旁求得他材飲水
不受墨堅滑已支庶粗燥乃臧獲信知天壤間尤物神
所惜罕見固為貴有亦未易識璫玉混一區語盡三歎
息摩挲蒼蘚厓此言可深刻

覓風字歛硯詩贈侍其府尹 元王惲

硯本發墨具不爾安用他碧紫暈鸛眼黝黑深宮鴉彼
端類高人風姿固云佳遠韻不少吝清談浩無涯但於

當機時未免思棼拏若或砥礪用茫然手空又硬則墨
為褪軟則磨泥沙惟歛士之傑體性何交加羅紋與刷
絲一寸皆可嘉回視端谿公有名實則差新安山水窟
澤大生龍蛇舉世被其利何有蛭與鼃山高谿水清其
芒例如礪嘗聞右軍硯風字琢手奢是名為水箕朶頤
駭哈呀松煤燼無餘惟恐中書了池寬水瀾漫挹彼如
尊洼陂陀浸半海揮灑生雲霞平生未嘗有夢寐江之
涯君今去為邦過此空成嗟包公尹端州歸不一硯拿

翫肝類安邑一笑春生華書生乞索態殆是心貪邪襴
衡溺所愛竟摻漁陽搥今冬與來春會有泛斗槎雄雉
或雌縵分送張華家

七言古

答陳舜俞推官惠詩求全瓦古硯

宋韓琦

鄴宮古瓦埋煙草取之為硯成堅好求者如麻幾百年
宜乎今日難搜討吾邦巧匠世其業能辨瓌竒幼而老

隨材就器固不遺大則梁棟小芬橑必須完者始稱珍
何殊巨海尋三島荆人之璧尚有瑕夏后之璜豈無考
況乎此物出坏陶千耕萬劬常翻攪吾今所得不專全
秘若英瑤藉文縑君詩若擇未如意持贈只虞笑絕倒
君不見鎮圭尺二瑁四寸大小雖異皆君寶

謝寇十一惠端硯

宋陳師道

百工營才先利器市道居貨如作贅書生活計亦酸寒
斷磚半瓦寧求備端谿四山下龍淵鬱積中州清淑氣

金聲玉骨石為容
河江屈流雲作使
滑如女膚色馬肝
夜半神光際天地
諸天散花百神喜
知有聖人在當世
没人投深索千丈
探領適遭龍伯睡
轆轤輓出萬人負
千歲之藏一朝致
琢為時樣供翰墨
什襲包藏百金貴
北行萬里更衆目
寇卿好事不計費
南鄰居士卿之孫
豐悴相從不為異
似隣陶瓦磨竈煤
輟誦不減前人志
人言寒士莫作事
鬼奪客偷天影碎
龜玉韞匱與無同
錦衾還客棄佳惠
衆所欲得當有緣
天獨於余可無意

敢書細事注魚蟲要得華嚴八千偈

魯直惠洮河綠石作冰壺硯次韻

宋張耒

洮河之石利劒矛磨刀日解十二牛千年荒徼困沙礫
一日見寶來中州黃子文章妙天下獨駕八馬森幢旒
平生筆墨萬金直竒煤利翰盈筐收誰持此硯參案几
風濶近手寒生秋包持投我棄不惜副以清詩帛加璧
明窗試墨吐秀潤端谿歛州無此色野人齋房無翫好

慙愧衣冠陳裸國
晁侯碧海為文詞
盤礴萬頃澄清漪
新篇來如徹札箭
勁筆更似畫沙錐
知君自足報蒼壁
愧我空賦瓊瑰詩

謝人惠硯

宋程俱

帝鴻墨海世不見
近愛端谿青紫硯
谿流見底寒且清
光凝淺紺淵之精
斧柯千古畱仙局
雲暗半山含紫玉
割雲鑱玉巧如神
龍尾銅臺可奴僕
君來自南數千里
不載珠璣如薏苡
芊芊谿草裹石硯
文字之祥直送喜

明窻大几墨花春爐火吐蘭千穗雲虛中含默靜相對
那復草玄驚世人

陳順之靈壁石硯山

宋樓鑰

名畫法書環四壁中有米家真寶石壁峰森聳外澗流
他物雖奇敢爭席舊屬半山老仙人佛印乞之如乞鄰
阿童有力負之走一時攘取或紛綸此石天然非琢磨
是時有水生巖阿至今硯池尚餘潤歲月既久惜不多
幾年徒見士夫說一旦喜看形偃月傍連玉立兩於菟

主人照映冰壺徹陳侯之富可敵國會有寶光驚四塞
呼童吸盡硯中水更為輕畚翫竒刻不堪回首江南李
空唱多愁似春水更不如此石千載傳玉砌雕欄等糠
粃寶晉得之真不易身後寧知亦輕棄只今傳翫知幾
人當日鎖窗空自秘端歎爭名南北部勿向雷門揚布
鼓銅臺錫瓦更不須祇合觚稜蔭風雨

賦張秋泉真人所藏硯山

元趙孟頫

泰山亦一拳石多勢雄齊魯青魏哉此石却是小岱嶽

峰巒無數生陂陀千巖萬壑來几上中有絕澗橫天河
粵從混沌元氣判自然凝結非鑄磨人間奇物不易得
一見大叫爭摩挲米公平生好奇者大書深刻無差訛
傍有小硯天所造仰受筆墨如圓荷我欲為君書道德
但願此石不用鵞巧偷豪奪古來有問君此意當如何

硯山詩

元
揭傒斯

何年靈壁一拳石五十五峯不盈尺峯峯相向如削鐵
祝融紫蓋前後列東南一泓尤可愛白晝玄雲生靈霽

在唐已著羣玉賦入宋更受元章拜天台瀕洞雲海連
戴氏藏之餘百年護持不浣權貴手倉皇獨與身俱全
帝旁真人乘紫霞尺書招之若還家陰崕洞壑寒嵒砢
宛轉細路通褒斜崑崙蓬萊與方壺坐卧相對神仙居
硬黃從寫黃庭帖汗青或抄鴻寶書秦淮咽咽金陵道
此物幸不隨秋草願君谷神長不老淨几明窗永相保

古硯歌

元宋元

神媧踏雲補天去遺下一團蒼黑天千年萬年乾不得

長帶盤古青紫煙玉工剖天天化石石內星精有餘魄
瑤光發炯成禹璧海王川后輸玄液帝青呵霧坤倪濕
匣月不開太陰泣破天殘缺無人補一穴絲絲漏春雨
空藏老石磨今古補天何時與天補

賦翠濤硯

元倪瓚

嶽翁常寶翠濤石今我還珍翠濤硯翠濤泐泐生縠紋
雲章龍文發奇變米芾硯山徒自惜此硯顛應未曾見
我初倉卒失神物玉蟾寂寞空瞻戀珠還合浦乃有時

洗滌摩挲冰玉姿書舟輕迅逐鳬鷺喜出火宅臨清漪
松雪磨香淬毛錐天影江波淡碧滋一詠新詩開我睂
灘哥石硯歌

明宋 漁

朱君嗜古米黻同三代彝器藏心胸灘哥古硯近獲見
驚喜奚翅逢黃琮硯煤敷紙巧摹搨訪我一陳始終
有唐四葉崇象教梵僧航海來番禺手持貝葉寫健相
翻譯華竺三談玄空辭義幽深衆目識當時授筆唯房融
硯中淋漓墨花濕助演真乘誠有功愛其厚重為題識

七月七日元神龍鬼工雷斧琢削古天光電影生新容
袞將四尺廣踰半作鎮弗遷猶華嵩涉唐入宋歲五百
但見寶氣浮晴虹南渡羣公競賞識氏名環列縈秋蟲
朔元雖以實內府棄寘但使煙埃封方今聖人重文獻
璫蒙舟載來江東風磨雨濯露精彩奉勅昇入文華宮
宮中日昃萬幾暇侍臣左右咸雲從紫端玄歛盡斥去
欣然為此回重瞳重瞳一顧光照日天章奎畫分纖濃
有才沈埋恨已久石如能語誇竒逢維昔成周全盛日

兇戈盾衣并大弓藏諸天府遺孫子用以鎮國昭無窮
願將斯硯傳萬世什襲不下古鼎鐘上明文德化八極
下書寬詔蘇疲癯君方執筆掌綸誥願以此言聞帝聰
老臣作歌在何日洪武戊午當嚴冬

五言律

硯

唐李嶠

左思裁賦日王充作論年光隨錦文發形帶石巖圓積
潤循毫裏開池小學前君苗徒見熟誰詠士衡篇

古石硯

唐 李山甫

追琢他山石方圓一勺深抱真唯守墨求用每虛心波
浪因文起塵埃為廢侵憑君更研究何啻值千金

龍尾石硯寄猶子遠

宋 蘇軾

皎皎穿雲月青青出水荷文章工點黜忠義老研磨偉
節何須怒寬饒要少和吾衰此無用寄與小東坡

破硯

元 楊載

彼美端谿石家藏歲月多廉隅皆破缺筋力盡研磨玉

亦堅而已星如粲者何向來曾自詭持用掇高科

破硯

元
薩都拉

巨璞何人鑿磨穿偶至今系文虛綠潤雨氣共玄陰瓦
礫開無異塵埃積轉深明光幾攜入往事復何心

七言律

襲美以紫石硯見贈以詩迎之

唐
陸龜蒙

霞骨堅來玉自愁琢成飛燕古釵頭澄沙脆弱聞應伏

青鐵沈埋見亦羞
最稱風亭批碧簡
好將雲竇漬寒流
君能把贈行吟客
徧寫江南物象酬

以紫石硯寄魯望兼酬見贈

唐皮日休

樣如金甌小能輕
微潤將融紫玉英
石墨一研為鳳尾
寒泉半勺是龍睛
騷人白芷關心切
狎客紅筵奪眼明
兩地有期皆好用
不須空把洗谿聲

元珍以詩送綠石硯所謂玉堂新樣者

宋王安石

玉堂新樣世爭傳，況以蠻谿綠石鐫。
嗟我長來無異物，愧君持贈有佳篇。
久埋瘴霧看猶濕，一取春波洗更鮮。
還與故人袍色似，論心於此亦同堅。

獲硯

宋 劉克莊

二硯溫如玉，琢成信知天地有精英。
馬肝紫潤尤宜沐，鵲眼青圓宛似生。
未愛潘郎呼作友，便教米老拜為兄。
今年几案多奇獲，應是儒生命漸亨。

再獲一硯自和

劉克莊

三硯聯翩買券成絕勝玉杵聘雲英拊摩無粟向肌起
塗抹有花從筆生韞匱每愁逢暴客傾囊或笑費方兄
古來事業由勤苦不信磨穿道不亨

謝書巢送宣和瀘石硯

元虞集

巢翁新得瀘州硯拂拭塵埃送老樵毀壁復完知故物
沈沙俄出認前朝毫翻夜雨天垂藻墨泛春冰夜應潮
恐名相如今草檄為懷諸葛渡軍遙

端石硯

元宋元

千年岳璞斬新硎一片琳腴截紫青雲漢帶星來玉匣
墨池蒸雨出滄溟煙開霧斂天晶彩海靜江澄地典刑
要與陶泓作佳傳老磨松液寫黃庭

鐵硯

元謝宗可

不用端谿割紫雲鑄來壯士鐵心存一方自出爐鎚巧
百鍊元無斧鑿痕金炁冷涵池水潤土花腥蝕墨煙昏
堅剛千古難磨了誰為扶桑賦曉暉

五言絕句

硯

金李俊民

端谿溫潤石價重百車渠一滴元潭水
蠅頭萬卷書

貯香室

明盛時泰

花開硯池旁
花落硯池底
洗硯譯經時
斛盡龍池水

七言絕句

徐虞部以龍尾石硯邀余第品仍授來使持還

書府

宋蔡襄

玉質純蒼理緻精
鋒鋟都盡墨無聲
相如問道還持去

肯要秦人十五城

偶於龍井辯才處得歙硯甚奇作小詩

宋
蘇軾

羅細無紋角浪平半丸犀壁浦雲泓
午窗睡起人初靜
時聽西風拉瑟聲

過餘干吳師中秀才以小詩惠歙硯次韻謝之

宋
周必大

舊曾起草向明光獨與羅文近
赭黃三載瓦池研
龜墨

因君聊復夢羲皇

洮石硯

金馮延登

鸚鵡洲前抱石歸
琢來猶自帶清輝
芸窗盡日無人到
坐看玄雲吐翠微

銅雀臺瓦硯

金元好問

愛惜鉛華洗又看
畫闌桂樹雨聲寒
千年不作鴛鴦去
博得書生笑老瞞

惜硯中花

元方回

花檐移來錦繡叢
小窗瓶水浸春風
朝來不忍輕磨墨
落硯香黏數點紅


硯

明
郭登

形模麤野已堪羞
况復鴛頑滑似油
常笑石卿才不逮
有何功業便封侯



御定佩文齋詠物詩選卷一百八十一



總校官庶吉士臣侍朝

校對官編修臣許兆椿

校對官主事臣張培

謄錄監生臣馮植基

謄錄監生臣陸費鑒